



Oqaatsuni oqaluffiliornissaq siunertaralugu sanaartornissamut pilersaarummik suliaqaqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen Jensen, Siumut)

(Siullermeerneqarnera)

Inatsisartunut ilaasortamut Doris Jakobsen Jensen qujanaq siunnersuuteqarninnut.

Ajoraluartumik nuna tamakkerlugu aserfallatsaaliinermut kinguaattooqqaneq annertoqaaq. Oquk ajornartorsiutaasorujussuuvoq ajornartorsiutillu qaangerniarnissaat annertuumik suliaassaalluni.

Siunnersuuteqartut tunngavilersuummini allappaa, Oqaatsuni innuttaasut oqaluffik atuarfiutigisoq oquk pissutaalluni atorreqarsinnaajunnaartoq. Akerlianik Naalackersuisut allapput, illu atorreqaqqilereersimasoq. Uani pingaartuusorinarpoq misissussallugu ajornartorsiut aaqqinneqarsimanersoq imaluunniit sumut killinnersoq.

Taakku saniatigut imaappasippoq, illu taanna oqaluffittut atuarfiutigisutut nalunaarsorneqarsimasoq, taassumalu kingunerissavaa, Namminersorlutik Oqartussat pinnagit, Avannaatali Kommunia, aserfallatsaaliinissamut- aaqqissuussinissamullu pisussaasuusoq. Uani pingaartuuvoq, Inatsisartut tungaanniit ataqqissagipput, oqartussaaffiup kommunimiinera.

Taamatut oqareerluta, miserratigineqassanngilaq, oqaluffippassuit aaqqissuunneqarnissaat pisariaqartinneqarmat. Taamaattumik Demokraatit Naalackersuisut allannguutissatut siunnersuutaat ilalernartippaat, Naalackersuisut peqquneqarmata Ilagiit suleqatigalugit sanaartornissamik pilersaarusoqqullugit, tassani nutaanik sanaartorneq aaqqissuussinerlu oqaluffinni pisariaqartinneqartoq qulaajarneqassammat.

Taamatut oqaaseqaateqarluta Naalackersuisut allannguutissatut siunnersuutaata akuerineqarnissaa innersuussutigaarput Kultureqarnermi, Ilinniartitaanermi, Ilisimatusarnermi Ilageeqarnermilu ataatsimiititaliami suliareqqinneqarnissaa innersuunneqarluni.